

5. Tama rāua ko Uncle Huri

Ngā Kiripuaki



TAMA



HURI

Kāpeka: Ka kite a Tama i a Uncle Huri rāua ko Uncle John Boy e kerī ana i te kāri me te mahi i te wairākau. Whuuuuu te pirol! Ka karanga atu a Tama.



TAMA:

Kia ora Uncle Huri.



HURI:

Kia ora e Tama. E pēwhea ana?



TAMA:

E pai ana Uncle. He pātai tāku Uncle.



HURI:

Ka pai e Tama. Pātai mai.



TAMA:

Uncle, ka pēwhea tā mātou puta i te pōharatanga?

*Ka tiro ohorere atu a Huri ki te tama nei. He tūru roa kei te taha o te kāri.
Ka noho a Huri rāua ko Tama ki te kōrero.*



HURI:

Hmmmm, he aha koe e pātai nei i tēnā pātai?



TAMA:

He pēnei Uncle, kāore au i te pīrangi hoki ki te mōtēra noho ai. Engari e mōhio ana ahau, kāore mātou e taea te noho ki te Marae nei mō ake tonu atu.



HURI:

He tika tāu boy, kāore koutou e taea te noho ki konei mō ake tonu atu. E haere mai ana te wā me puta koutou.



TAMA:

Nō reira, he aha he huarahi e puta ai mātou i te pōharatanga?



HURI:

Ko te huarahi tika hei whai mā koutou i tēnei wā, ko te noho tahi i raro i te tuanui kotahi, arā, ko te whiwhi kāinga mahana, kāinga maroke kia kaua e kino kē atu te māuiui o Johnny. Engari i mua i te whiwhi kāinga pērā, me whiwhi mahi ō mātua, me whiwhi tautoko mai i te kāwanatanga.



TAMA:

Koinā te mahi a Auntie Pip nē Uncle, koia te kanohi tautoko a te kāwanatanga.



HURI:

Āe rā boy. Koia. Ko tā mātou mahi i te Marae nei, he manaaki i te tangata ahakoa ko wai, ahakoa nō whea. He nui ngā tāngata kei te pīrangi āwhina i a koutou. He nui hoki ngā tāngata o te tāone nei e noho pōhara ana, e noho kāinga kore ana.



TAMA:

Uncle, he aha te take he tino uaua mō ngā whānau i tēnei wā? Kāore au e pai ki tēnei oranga!

Kātahi ka kite a Huri i a Koro Tame e haere mai ana. Ka pōwhiringia ia kia noho i tō rāua taha.



HURI:

Kia ora e Tame! Anei Tama, mā Koro Tame pea āu pātai e whakautu.

Ka hoki a Huri ki te kerī i te kāri me te whakarite i te wairākau.